

STANDPUNT VAN DIE NG KERK: RING VAN LOUIS TRICHARDT

1. Die konsep van 'n Nasionale Demokratiese Revolusie kan, weens sy onderliggende filosofie en praktyk, nie 'n versoenings-proses, of 'n nasiebou-aksie wees nie.
2. Die konsep van 'n NDR skep 'n dualistiese regspraktyk – die van 'n revolutionêre reg, naas en teenoor 'n konstitusionele reg in een samelewing.
3. Die filosofie van 'n NDR skep 'n dualistiese staatsorde van 'n staat binne 'n staat.
4. Daarom skep die filosofie van die NDR 'n disfunksionele gemeenskap van oorheersers en onderdrukte: 'n magselite wat met 'n eie reg en orde van 'n binne-staat verhewe bo enige aanspreeklikeheid is van die reg en orde van die konstitusie van 'n buite-staat, waaraan almal buiten die magselite onderworpe is.
5. Die NDR is nie 'n revolusie van burgers teen die owerheid nie. Dit is 'n pseudo-revolusie. Dit is anargie deur die verteenwoordigdes van owerheid teen die staat met die voorwendsel dat dit 'n revolusie deur die burgers van die land is, terwyl dit die omstandighede en klimaat skep vir 'n werklike revolusie.
6. Die NDR se doelwit is die skep van 'n anargistiese regeringstelsel met die verskuilde motief om die nasionale en private bates van die gemeenskap te plunder en die openbare en privaatinstellings wat in die pad van hierdie plundering staan, te vernietig met die magsmiddele van die staat.
7. Die NDR is daarom 'n ideologie wat wetteloosheid in ons land as 'n nuwe lewensorde skep.
8. Daarom is die NDR die ideologie wat besig is om die staat en openbare gemeenskapsinstellings te kriminaliseer.
9. Die NDR se nasionalisering is 'n proses wat net 'n magselite verryk en die middele en instellings waardeur die bevolking hulleself kan ophef, vernietig.
10. Die NDR regverdig en bedryf sy dualistiese reg en staatsorde deur die aanhitsing en bedryf van rassisme.
11. Die NDR lewer die openbare- en privaat bates van die land uit aan internasionale oportunisme en gierigheid en lewer die land daardeur uit aan internasionale kriminaliteit.
12. Die NDR verskuil hierdie plundering met anti-rassistiese retoriek, terwyl hulle self Afrika se potensiaal en geleentheid vir sy eie inwoners ten koste van internasionale kapitalistiese uitbuiting vernietig, soos dit in die Mapungubwe tragedie sigbaar is.
13. Die NDR is die grootste krag wat Suid Afrika as staat vasvang in 'n proses om 'n mislukte staat te word.
14. Die NDR se filosofie en optredes is in stryd met die geloof en waardes van die Christelike geloof.
15. Lidmate van Christelike kerke behoort uit hulle geloof in Christus en hulle toewyding aan die wet van die Here in protes en verset teen die NDR te kom.
16. Lidmate wat hulle self wetend of onwetend bevoordeel uit die plundering van die NDR tree teen hulle geloof in Christus en die eise van die Woord van God op.
17. Lidmate wat hulleself, wetend of onwetend, deur die NDR probeer verryk of beveilig, kan nie hulle optrede as Christelike versoening regverdig nie.
18. Poginge van die kerk en kerkleiding om die botsing van geloof en waardes met die NDR te pasifiseer onduik hulle profetiese taak as kerk teenoor 'n godlose en mensvernietigende ideologie.
19. Aksies waarin die kerk hulleself as medewerkers vir die sosiale montasies van die NDR uit gee, maak hulle medeaanspreeklik vir die opbou van 'n anargistiese tirannie wat die kerk en gemeenskap gaan vernietig.
20. Lidmate wat hulle werk, aanstellings, eiendom, kultuur en lewe verloor deur die NDR en die wettelose gemeenskap wat die NDR skep, moet hulle geloof in God stel as Here van die skepping en sy voorsienigheid, hulle vreemdelingskap as Christene in hierdie godlose en wettelose wêreld met waardigheid en selfrespek opneem, hulle geloof stel in God se beskikkingsmag om die kwaad ons ten goede te keer, Christus vertrou om volharding in die goeie as gawe in ons te skep, die kwaad met vrymoedigheid teen te staan en nie uit moedeloosheid of verbittering hulle geloof verloën of hulle waardes verloor nie.